

AUGLÝSING

um staðfesting forseta Íslands á reglugerð um breytingar á reglugerð nr. 90/1993, fyrir Háskóla Íslands, með áorðnum breytingum.

Forseti Íslands féllst hinn 12. þ.m. á tillögu menntamálaráðherra um að staðfesta eftirfarandi reglugerð um breytingar á reglugerð nr. 98/1993, fyrir Háskóla Íslands, með áorðnum breytingum:

1. gr.

Við 50. gr. bætist ný 2. mgr. svohljóðandi:

Heimilt er í framhaldsnámi að gefa einkunnir í bókstöfum samkvæmt eftirfarandi: 9,0 - 10 er A; 7,25 - 8,99 er B; 6,0 - 7,24 er C og 5,0 - 5,99 er D. Lægri einkunn en 5,0 er E. Aðaleinkunn sem gefin er í bókstaf er fundin skv. 1. mgr. og rituð skv. 2. mgr.

2. gr.

1. ml., 1. mgr. 51. gr. breytist og orðist svo:

Stúdent telst ekki hafa staðist próf nema hann hljóti einkunnina 5,0 eða ígildi hennar í bókstaf.

3. gr.

Við 74. gr. bætast eftirfarandi mgr.:

Læknadeild veitir kennslu og þjálfun til M.S. prófs í heilbrigðisvísindum. Próftitillinn M.S. er veittur fyrir 60 eininga framhaldsnám að afloknu viðeigandi háskólaprófi. Inngöngu í þetta nám geta fengið þeir sem lokið hafa kandidateitprófi í lyfjafræði lyfsala eða B.S. prófi í líffræði, læknisfræði, hjúkrunarfræði eða sjúkraþjálfun frá Háskóla Íslands eða öðru háskólaprófi sem læknadeild telur að feli í sér viðeigandi undirbúning til námsins.

Nefnd skipuð af læknadeild er deildarforseta til aðstoðar við að meta umsóknir um M.S. nám, fylgjast með náminu í heild og samræma það. Sérstök umsjónarnefnd skipuð af deild hefur umsjón með námi hvers stúdents í M.S. námi. Námið felur í sér þjálfun í vísindalegum vinnubrögðum og er ritgerð byggð á eigin rannsókn hluti námsins. Stærð rannsóknarverkefnis er ákveðin í námsáætlun og skal vera minnst 30 námseiningar en mest 45. M.S. rannsóknarverkefni lýkur með því að stúdent leggur fram ritgerð og heldur um hana fyrirlestur. Ritgerð og fyrirlestur eru dæmd af tveimur sérfræðingum sem umsjónarnefnd tilnefnir til starfans. Aðrar námseiningar til M.S. prófs öðlast stúdent með þátttöku í námskeiðum. Lágmarkseinkunn fyrir námskeið, sem tekin eru sem hluti af námi til M.S. prófs, er 6,0.

Læknadeild setur nánari reglur um M.S. nám.

4. gr.

1. mgr. 92. gr. breytist og í stað hennar kemur eftirfarandi:

Prófgreinar í fyrri hluta náms í viðskiptafræðum fyrir aðra nemendur en þá sem velja tungumálasvið eru stærðfræði (3e), reikningshald (9e), tölfræði (6e), upplýsingatækni (3e), íslensk haglýsing (3e), aðferðafræði (3e), lögræði (6e), þjóðhagfræði (6e), rekstrarhagfræði (9e), markaðsfræði (3e), framleiðsla (3e), tjáning og samskipti (3e) og skattaréttur og skattskil I (3e).

Prófgreinar í fyrri hluta náms í viðskiptafræðum fyrir nemendur sem velja tungumálasvið eru stærðfræði (3e), reikningshald (9e), tölfræði (6e), upplýsingatækni (3e), íslensk haglýsing (3e), aðferðafræði (3e), lögræði (6e), þjóðhagfræði (3e), rekstrarhagfræði (9e), markaðsfræði (3e), framleiðsla (3e), tjáning og samskipti (3e) og tungumál (6e).

5. gr.

2. mgr. 93. gr. breytist og í stað hennar kemur eftirfarandi:

Prófgreinar í viðskiptakjarna fyrir aðra nemendur en þá sem velja tungumálasvið eru stjórnun (6e), fjármál fyrirtækja (6e), markaðsfræði (3e), framleiðsla (3e), aðgerðarannsóknir (3e), upplýsingatækni (3e) og aðrar greinar (6e) samkvæmt ákvörðun viðskiptaskorar.

Prófgreinar í viðskiptakjarna fyrir nemendur sem velja tungumálasvið eru stjórnun (6e), fjármál fyrirtækja (6e), markaðsfræði (3e), framleiðsla (3e), aðgerðarannsóknir (3e), upplýsingatækni (3e), þjóðhagfræði (3e) og skattaréttur og skattskil I (3e).

6. gr.

Í stað 2. og 3. ml. í 3. mgr. 94. gr. kemur eftirfarandi:

Ritgerð vegur 6 einingar nema á reikningshalds- og endurskoðunarsviði þar sem hún vegur 3 einingar.

7. gr.

Við 95. gr. bætist ný mgr. sem verður 6. mgr. svohljóðandi:

Til þess að standast fullnaðarpróf í framhaldsnámi í hagfræði þarf stúdent að ljúka námi með eigi lægri aðaleinkunn en C.

8. gr.

Ákvæði til bráðabirgða í XII. kafla orðist svo:

Ákvæði til bráðabirgða I.

Nemendur sem hefja nám á 3. og 4. ári í viðskiptaskor haustið 1994 eiga rétt á að ljúka námi sínu í samræmi við fyrri reglugerðaákvæði þó þannig að ákvæði reglugerðar um vægi ritgerðar gilda.

Ákvæði til bráðabirgða II.

Nemendur sem hefja nám á 2. ári í viðskiptaskor haustið 1994 eiga rétt á að ljúka námi sínu í samræmi við fyrri reglugerðaákvæði þó þannig að íslensk haglýsing vegur 3 einingar og markaðsfræði I er kennd á haustmisseri 2. árs og telst þá til fyrri hluta. Einnig gilda ákvæði reglugerðar um vægi ritgerðar.

Ákvæði til bráðabirgða III.

Nemendur sem hefja nám á 2. ári í viðskiptaskor haustið 1994 geta valið tungumálasvið. Þeir taka á 2. ári eftirtalin námskeið: Tungumál (6e), reikningshald II (3e), reikningshald III (3e), lögfræði B (3e), tölfræði A (3e) og B (3e), íslenska haglýsingu (3e), þjóðhagfræði II fyrir viðskiptafræðinga (3e) og rekstrarhagfræði II fyrir viðskiptafræðinga (3e). Á 3. ári taka þessir nemendur eftirtalin námskeið: Tungumál (12e), skattaréttur og skattskil I (3e), markaðsfræði I (3e) og II (3e), framleiðsla I (3e) og II (3e), stjórnun I (3e) og II (3e). Á 4. ári taka þessir nemendur auk tungumála (12e), fjármál I (3e) og II (3e), upplýsingatækni II (3e), aðgerðarannsóknir (3e) og skrifa ritgerð (6e).

Ákvæði til bráðabirgða IV.

Nemendur sem hefja nám á 3. ári í viðskiptaskor haustið 1994 og luku með árangri framhaldsnámskeiði í frönsku á vormisseri 1994 geta valið tungumálasvið. Þessir nemendur taka á 3. ári eftirtalin námskeið: Tungumál (12e), markaðsfræði I (3e) og II (3e), framleiðslu I (3e) og II (3e), stjórnun I (3e) og II (3e). Á 4. ári taka þessir nemendur auk tungumála (12e), fjármál I (3e) og II (3e), upplýsingatækni II (3e) og aðgerðarannsóknir (3e) og skrifa ritgerð (6e).

9. gr.

Við 96. gr. bætist ný mgr. sem verður 2. mgr. svohljóðandi:
Forseti og varaforseti deildarinnar skulu ekki vera úr sömu skor.

10. gr.

98. gr. breytist á eftirfarandi hátt:

Í staflið a) bætist við orðið ítalska á eftir orðinu íslenska.

Stafliður b) verði svohljóðandi: Til M.Paed. prófs: Danska, enska, íslenska. Heimilt er með samþykki deildar að taka þetta nám upp í öðrum greinum deildarinnar.

Í stað 20e í 2. ml., 4. mgr. III. liðar 100. gr. komi 30e.

11. gr.

Reglugerð þessi sem er sett samkvæmt heimild í 40. gr. laga, um Háskóla Íslands, nr. 131/1990, öðlast þegar gildi.

Menntamálaráðuneytið, 14. júlí 1994.

Ólafur G. Einarsson.

Guðríður Sigurðardóttir.

LÖG

um skipulag ferðamála.

FORSETI ÍSLANDS

gjörir kunnugt: að ég samkvæmt III. ákvæði til bráðabirgða í lögum nr. 81 19. maí 1994, um breytingu á lögum um skipulag ferðamála, nr. 79/1985, sbr. lög nr. 59/1988, 20. tölul. 136. gr. laga nr. 20/1991, 21. gr. laga nr. 23/1991, 4. gr. laga nr. 48/1992 og 9. gr. laga nr. 62/1993 hefi látið fella meginmál hinna fyrstnefndu laga, ásamt áorðnum breytingum, inn í lög nr. 79/1985 og gef þau út svo breytt:

I. KAFLI

Tilgangur og yfirstjórn.

1. gr.

Tilgangur laga þessara er að stuðla að þróun ferðamála sem atvinnugreinar og skipulagningu ferðaþjónustu fyrir íslenskt og erlent ferðafólk sem mikilvægs þáttar í íslensku atvinnu- og félagslífi, bæði með hliðsjón af þjóðhagslegri hagkvæmni og umhverfisvernd.